

關愛的故事



拾荒長者的故事

你叫我做執紙皮阿婆啦，我 70 幾歲。呢條街好似我咁執嘢嘅阿公阿婆都有幾個。大部分都係為咗維持生計，有啲就係幫補頭家，有個就話做嚟過日神嘞。

我地邊有工做呀，咁老邊有人請架。交租、伙食、電話費、水、電費，樣樣都係錢。個仔都叫我咪去執架喇，但佢又唔係搵得多，顧得自己頭家又唔顧得到我，佢幫我交租已經好好架喇，自己就唯有盡慳。

我多數係屋企附近嘅街市、鋪頭執紙皮，有時隔離鄰舍都會俾啲報紙我去賣，佢地有啲人就執舊衫、執啲爛銅爛鐵。我覺得又唔係偷、又唔係搶，自己有能力執，用車仔推去賣，賣得一蚊就得一蚊，賣到十蚊就得十蚊，夠買餸夠飲茶，我就好滿足架喇，每個月都賣到三幾百架！

不過，長時間喺街度執拾同整理，日曬雨淋，都幾係架，而推紙皮過馬路嗰陣就最危險。有陣時我都會戴勞工手套，喺垃圾桶度執鋁罐，唔戴手套，會被爛玻璃樽割傷。手手、腳腳，特別係條腰就最易傷架喇，咪隨身帶定啲跌打藥呀、刀傷藥呀，一整親就可以止血。

我無咩心頭高嘅，求其每日有幾蚊買吓嘢就算架喇，有咪食多啲、有咪食少啲囉，我又唔識去擺綜援，啲人話擺綜援好難架，人地有嘢做又話唔得，又話要知道你有幾多身家，我地啲老骨頭邊有人理架，過得一日得一日囉，你話係唔係？

(500 字)